



Bilten Saveza općina i gradova Federacije Bosne i Hercegovine



Godina: XX

Datum: 07.07.2023.

Broj: 288

USLUGE SAVEZA:

• PRAVNO SAVJETOVALIŠTE:

Selma Fišek, viši saradnik za pravna pitanja
selma@sogfbih.ba

• FINANSIJSKO SAVJETOVALIŠTE

Halko Basarić, viši saradnik za finansijska
pitanja
halko@sogfbih.ba

KORISNI LINKOVI ZA FONDVE EU:

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmmed.eu
<https://tacso.eu/>
<https://euinfo.ba/en/>
www.balkanfund.org
<https://eacea.ec.europa.eu>
www.welcomeurope.com

ADRESA:

Musala br.5/1
71000 Sarajevo
Telefon: +387 33 216 502,
209 024, 209 120
fax: +387 33 552 810, 216 502
savez@sogfbih.ba

ZAJEDNIČKA SJEDNICA PREDSJEDNIŠTVA SAVEZA OPĆINA I GRADOVA FBIH I PREDSJEDNIŠTVA SAVEZA OPŠTINA I GRADOVA REPUBLIKE SRPSKE

U Neumu je 31. maja/ svibnja održana zajednička sjednica Predsjedništva Skupštine Saveza općina i gradova Federacije Bosne i Hercegovine i Predsjedništva Saveza opština i gradova Republike Srpske, uz podršku Kongresa lokalnih i regionalnih vlasti Vijeća Evrope.



Uvodnim obraćanjima prisutne su na početku pozdravili predsjednik Predsjedništva Skupštine Saveza općina i gradova Federacije Bosne i Hercegovine Hamdo Ejubović, predsjednik Saveza opština i gradova Republike Srpske Ljubiša Ćosić, Bernd Vöhringer, predsjednik Doma lokalnih vlasti Kongresa lokalnih i regionalnih vlasti Vijeća Evrope i Rafael Benitez, direktor Kongresa lokalnih i regionalnih vlasti.

Sjednica je bila svojevrsni vid umrežavanja koji ima za cilj da ojača saradnju i promoviše zajedničke vrijednosti, ali takođe i da adresira zajedničke izazove na lokalnom nivou.

Sjednici su prisustvovali načelnici i gradonačelnici - članovi predsjedništava, rukovodstva saveza te članovi Kongresa lokalnih i regionalnih vlasti.

Razgovarano je o prioritetima i izazovima s kojima se susreću lokalne vlasti, zajedničkom radu dvaju saveza lokalnih vlasti i saradnji sa Kongresom lokalnih i regionalnih vlasti, postavljajući temelje za jačanje zagovaranja i zajedničkih napora u cilju jačanja lokalne demokratije.

Neke od tema o kojima je govoreno su: kandidatski status BiH za članstvo u Evropskoj uniji, harmonizacija domaćeg zakonodavstva sa propisima EU, značaj zajedničkih projekata Saveza opština i gradova Republike Srpske i Saveza općina i gradova Federacije BiH, uloga i značaj Kongresa lokalnih i regionalnih vlasti Vijeća Evrope s posebnim osvrtom na BiH, unapređenje saradnje Kongresa i dva saveza te dalje planiranje aktivnosti Kongresa lokalnih i regionalnih vlasti Vijeća Evrope.

Ovaj događaj organizovan je u okviru projekta „Inoviranje demokratskog učešća na lokalnom nivou u Bosni i Hercegovini“ kojeg sprovodi Kongres lokalnih i regionalnih vlasti Vijeća Evrope u sklopu Akcionog plana Vijeća Evrope za Bosnu i Hercegovinu 2022.-2025. godina. Projekat ima za cilj poboljšati kvalitet lokalne demokratije i stvoriti mogućnosti za građane da se uključe u inovativne participativne procese u Bosni i Hercegovini. Također, promoviše nove demokratske pristupe, otvorenu vlast, javnu etiku, transparentno i inkluzivno kreiranje lokalne politike u zemlji.

Zaključeno je da će se savezi općina/opština i gradova u Bosni i Hercegovini uz podršku Kongresa lokalnih i regionalnih vlasti Vijeća Evrope obratiti nadležnim vlastima u Bosni i Hercegovini sa zahtjevom za punu provedbu Evropske povelje o lokalnoj samoupravi, Zakona o principima lokalne samouprave u Federaciji Bosne i Hercegovine i Zakona o lokalnoj samoupravi Republike Srpske.

Video prilog o održanoj sjednici može se pogledati na sljedećem linku: <https://youtu.be/x88rdfznHqs>

ODRŽANA 7. SJEDNICA PREDSJEDNIŠTVA SKUPŠTINE SAVEZA

U Neumu je danas, 30. maja/svibnja održana 7. sjednica Predsjedništva Skupštine Saveza općina i gradova Federacije Bosne i Hercegovine.

Tokom sjednice, između ostalog, prezentiran je nacrt Izvještaja – „Ostvarivanje prava na lokalnu samoupravu u Federaciji Bosne i Hercegovine kroz usklađenost sa standardima Evropske povelje o lokalnoj samoupravi“ gdje su izvjestioci bili Adelina Džanković i međunarodni ekspert Jens Woelk.

Gospodin Woelk je detaljno elaborirao problem sa kojima se suočava lokalna samouprava u Federaciji Bosne i Hercegovine. Istakao je važnost podržavanja napora jačanja lokalnih demokratija i upravljanja.



Neum - sa sjednice Predsjedništva Skupštine Saveza

Predsjedništvo Saveza je zaključilo da se prezentirani Izvještaj zajedno sa preporukama dostavi višim nivoima vlasti, posebno domovima Parlamenta Federacije Bosne i Hercegovine, te da se insistira na provedbi preporuka, odnosno usklađivanju potrebnih zakonskih pripisa sa Evropskom poveljom o lokalnoj samoupravi i sa Zakonom o principima lokalne samouprave u Federaciji Bosne i Hercegovine.

Na Sjednici Predsjedništva Skupštine Saveza općina i gradova potpisan je Memorandum o saradnji između Saveza općina i gradova FBiH i Gender centra FBiH. Predsjednik Predsjedništva Skupštine Saveza općina i gradova FBiH, Hamdo Ejubović i direktorica Gender centra FBiH, Ana Vuković su potpisivanjem Memoranduma ozvaničili već uspostavljenju saradnju koja će omogućiti daljnje jačanje kapaciteta jedinica lokalne samouprave Federacije Bosne i Hercegovine, kroz različite oblike edukacija iz oblasti ravnopravnosti spolova, ali i drugih aktivnosti.

Posvećeni zajedničkom cilju jačanja značaja, učesća i efikasnosti jedinica lokalne samouprave da provode aktivnosti propisane Zakonom o ravnopravnosti spolova u Bosni i Hercegovini, te da realizuju aktivnosti usaglašene sa Gender akcionim planom Bosne i Hercegovine na lokalnom nivou, potpisivanjem ovog Memoranduma o saradnji, Gender centar FBiH i Savez općina i gradova FBiH potvrđuju da će zajednički usaglašavati i podržavati provedbu planiranih aktivnosti u radu sa jedinicama lokalne samouprave, a što uključuje zagovaranje, iznalaženje resursa i baze znanja o radu jedinica lokalne samouprave u oblasti ravnopravnosti spolova, te ostalim aktivnostima u skladu sa projektima i strateškim planovima.

Ova aktivnost se provodi u sklopu projekta “Jačanje saveza općina/opština i gradova u BiH” kojeg implementiraju Savez općina i gradova Federacije BiH i Savez opština i gradova Republike Srpske zajedno sa Švedskom asocijacijom lokalnih vlasti i regiona, a uz podršku vlada Švedske i Švicarske.

SASTANAK PREDSTAVNIKA SAVEZA OPĆINA I GRADOVA FBiH I PREMIJERA KANTONA SARAJEVO

U Sarajevu je 05. jula/srpnja 2023. godine održan radni sastanak predstavnika Saveza općina i gradova Federacije Bosne i Hercegovine i premijera Kantona Sarajevo Nihada Uka.

Između ostalih, sastanku su prisustvovali predsjednik Predsjedništva Skupštine Saveza općina i gradova Federacije BiH Hamdo Ejubović, direktor Saveza Vesna Travljanin, viši saradnik za pravna pitanja Selma Fišek, pravobraniteljica Općine Hadžići Meliha Halilagić, te predstavnici Ministarstva privrede Kantona Sarajevo.

Tema ovog sastanka bio je Zakon o izmjenama Zakona o vodama Kantona Sarajevo koji je Skupština Kantona Sarajevo usvojila 31.10.2022. godine kojim su jedinicama lokalne samouprave prenesene nadležnosti koje nije pratio prenos finansijskih sredstava. Istaknuto je da je Zakonom utvrđeni rok od 12 mjeseci prekratkro vrijeme za općine da preuzmu sve mjesne vodovode i iste daju na upravljanje pravnom licu koje je u skladu sa zakonskom regulativom specijalizirano za obavljanje tih poslova, te da je neophodno produžiti ovaj rok.



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

*Tema sastanka bio je
Zakon o izmjenama
Zakona o vodama
Kantona Sarajevo kojim
su jedinicama lokalne
samouprave prenesene
nadležnosti koje nije
pratio prenos finansijskih
sredstava za njihovo
izvršenje.*



Sa sastanka sa premijerom KS

Predsjednik Ejubović je u izjavi istakao da se razgovaralo o problemu koji je nastao nakon usvajanja izmjena Zakona o vodama Kantona Sarajevo, te poteškoćama kod njegove primjene, posebno zbog kratkog roka koji je ostavljen jedinicama lokalne samouprave.

“Ukazali smo premijeru Kantona Sarajevo kako je trenutno nemoguće primijeniti izmjene Zakona o vodama bez toga da se on sagleda sa svih aspekata. Osim toga, neophodno je da se njegova primjena odgodi na način da se da više vremena, te da se obezbijede sredstva kako bi se Zakon proveo. Konkretno, radi se o prenosu nadležnosti za izdavanje vodnih saglasnosti koje bi sada sa nivoa kantona trebale da se prenesu na jedinice lokalne samouprave, za što kadrovski one nisu osposobljene, a što one moraju da provedu kroz svoje sistematizacije te da prime državne službenike koji će raditi taj posao. Neophodno je da jedinice lokalne samouprave preuzmu brigu i poslove o lokalnim vodovodima koje su do sada obavljale različite grupe građana ili mjesne zajednice, te da to preuzmu na sebe što je jako težak i skup posao”, naglašava predsjednik Saveza Ejubović.

U nastavku je istakao da će Vlada Kantona Sarajevo i Ministarstvo privrede sagledati ovu problematiku kako bi se odredili dalji koraci u cilju prevazilaženja ovog problema.

“Mi smo zaista kooperativni i željni da se ova oblast uredi, ali na način kako je to moguće implementirati. Za to je potrebno više vremena i sredstava. Osim toga, razgovarali smo o nacrtu Zakona o lokalnoj samoupravi Kantona Sarajevo, što je jedan problem još od 2006. godine i koji nije riješen. S obzirom na funkcionisanje i složenost Kantona Sarajevo, ovaj Zakon još uvijek nije usvojen. Nadležnosti se prepliću između kantona, grada i općina što nikome ne doprinosi. Ovaj problem bi se mogao prevazići Zakonom ili da se pronađe rješenje koje je funkcionalno i koje će u dogledno vrijeme zadovoljiti potrebe iz svih oblasti koje treba da pokriju jedinice lokalne samouprave, a koje se prije svega tiču infrastrukture, komunalne djelatnosti, uređenja prostora itd.”

Premijer Kantona Sarajevo, Nihad Uk, je u svojoj izjavi istakao da je bilo zadovoljstvo biti na prvom sastanku sa Savezom općina i gradova Federacije BiH, da je od velikog interesa i koristi za Kanton Sarajevo, kao i za njega, kao premijera. „Učinit ćemo sve što je u našoj moći da se riješe neki izazovi između Kantona i općina, imamo i Grad Sarajevo, koja je posebna jedinica lokalne samouprave, a sve u interesu građana, lokalnih zajednica i Kantona Sarajevo”, kazao je premijer Uk.

Istakao je da će biti teško, jer pitanje odnosa u Kantonu Sarajevo između lokalnih zajednica i Kantona Sarajevo, već sigurno desetljećima nije riješeno i da je jako kompleksno pitanje koje, na ovaj način, ne može reći da će biti riješeno u ovom mandatu. Naveo je da će učiniti sve što je u njegovoj moći, kao premijera, da se olakša građanima Kantona Sarajevo i načelnicima, za sve ove nepravde koje evidentno postoje u sistemu, da se isprave, i još jednom je podvukao da je to u interesu građana tih lokalnih zajednica.

“Svi smo jedna strana, javna uprava, cilj nam je i zadatak da pružamo usluge građanima Kantona Sarajevo i sve što se može dogovoriti između ovih nivoa vlasti, imat će punu podršku Vlade Kantona Sarajevo, kao i Skupštine Kantona Sarajevo”, kazao je za kraj premijer Uk.

IZVJEŠTAJ „GARANCIJA LOKALNE AUTONOMIJE U FEDERACIJI BOSNE I HERCEGOVINE KROZ USKLAĐENOST SA STANDARDIMA EVROPSKE POVELJE O LOKALNOJ SAMOUPRAVI“

Cilj izvještaja, koji je izradio Savez u saradnji sa

Kongresom lokalnih i regionalnih vlasti Vijeća Evrope je iznijeti nalaze i predložiti preporuke u pogledu usklađivanja zakona sa Evropskom poveljom o lokalnoj samoupravi

Uvažavajući činjenicu da je Zakon o principima lokalne samouprave u Federaciji Bosne i Hercegovine *lex specialis* propis, kojim se uređuju sva pitanja od značaja za funkcionisanje jedinica lokalne samouprave kao zasebne oblasti sa svojim jasnim i specifičnim potrebama, načinom rada i funkcionisanja, Savez općina i gradova Federacije Bosne i Hercegovine je u više navrata ukazao na obavezu usklađivanja zakonskih propisa sa Zakonom o principima lokalne samouprave u Federaciji Bosne i Hercegovine utvrđeno članom 58. ovog Zakona na način da se izvrši prenos poslova i nadležnosti, kao i odgovornosti dodijeljenih jedinicama lokalne samouprave.

U svojstvu zakonskog zastupnika jedinica lokalne samouprave pred vlastima u Federaciji Bosne i Hercegovine ukazali smo i na problem neusklađenosti niza zakonskih propisa sa Evropskom poveljom o lokalnoj samoupravi kao ključnim međunarodnim ugovorom koji garantuje zaštitu prava lokalnih i regionalnih vlasti, a koji je Bosna i Hercegovina ratifikovala u cijelosti.

Zbog svega navedenog, Savez je u saradnji sa Kongresom lokalnih i regionalnih vlasti Vijeća Evrope izradio Izvještaj pod nazivom „Garancija lokalne autonomije u Federaciji Bosne i Hercegovine kroz usklađenost sa standardima Evropske povelje o lokalnoj samoupravi“.

Cilj izvještaja je iznijeti nalaze i predložiti preporuke u pogledu usklađivanja zakona sa Evropskom poveljom o lokalnoj samoupravi.

Navodimo neke od preporuka koje se nalaze u Izvještaju:

- Sve vlasti Federacije Bosne i Hercegovine u obavezi su poštovati poseban karakter Zakona o principima lokalne samouprave u Federaciji Bosne i Hercegovine u primjeni i tumačenju drugih zakona koji mogu uticati na lokalnu samoupravu, jer je Zakon o principima lokalne samouprave u Federaciji Bosne i Hercegovine usvojen je kao poseban zakon koji garantira lokalnu samoupravu i njene principe u odnosu na opće zakonodavstvo.

- Federacija Bosne i Hercegovine i kantoni dužni su hitno ispuniti zakašnjelu obavezu usklađivanja svojih zakona sa Zakonom o principima lokalne samouprave u Federaciji Bosne i Hercegovine, jer njihovo neusaglašavanje smanjuje djelokrug ovlaštenja i autonomije jedinica lokalne samouprave.

- Neophodno je usvojiti Zakon o finansiranju jedinica lokalne samouprave kojim će se regulisati pitanja prenosa i finansiranja nadležnosti jedinica lokalne samouprave, jer prenos rashodovnih nadležnosti jedinica lokalne samouprave obično ne prati prenos finansijskih sredstava za njihovo izvršenje.

Savez će u narednom periodu poduzeti aktivnosti u cilju stvaranja uslova za realizaciju preporuka iz Izvještaja, te očekujemo podršku i saradnju sa lokalnog nivoa u ovim procesima.

Izvještaj se nalazi na web stranici Saveza: <https://bit.ly/3JHw888>

Federacija Bosne i Hercegovine i kantoni dužni su hitno ispuniti zakašnjelu obavezu usklađivanja svojih zakona sa Zakonom o principima lokalne samouprave u Federaciji Bosne i Hercegovine, jer njihovo neusaglašavanje smanjuje djelokrug ovlaštenja i autonomije jedinica lokalne samouprave.

DODIJELJENA NAGRADA SAVEZ OPĆINA I GRADOVA FEDERACIJE BIH ZA NAJBOLJI NOVINARSKI ČLANAK ILI PRILOG SA LOKALNOG NIVOA

Hotel Ibis Styles u Sarajevu 26. juna/lipnja 2023. godine, bio je mjesto dodjele nagrade Saveza općina i gradova Federacije Bosne i Hercegovine za najbolji novinarski članak ili prilog sa lokalnog nivoa.

Ove godine nagrada je pripala Marku Zeljki, novinaru Radio-televizije Herceg-Bosna za prilog o povratničkoj priči u hercegovačko selo Du-brave.

„Često se spustimo na lokalnu razinu, kod ljudi odnosno individue. Obično ta mala sredina zna svakoga. Vlast poznaje građane dok oni poznaju općinsku odnosno gradsku upravu. Upravo ta iskustva pomažu kako bi građani se izrazili i kazali kako na primjer, grade svoju farmu. Upravo kroz medijsku prezentaciju takvih priča će i oni koji mogu pomoći vidjeti šta nam treba. A kada je povratnička priča u pitanju, svi to volimo jer je nešto pozitivno. Zahvaljujem se svima koji su prepoznali ovu priču“, kazao je novinar Marko Zeljko.



Sa dodjele nagrade za najbolji novinarski članak / prilog

Predsjednik Komisije za ocjenu pristiglih prijava na Konkurs za dodjelu nagrade Saveza općina i gradova Federacije Bosne i Hercegovine za najbolji novinarski članak ili prilog sa lokalnog nivoa Amir Misirlić, istakao je kako je prilog Marka Zeljke imao poseban kvalitet i dodatnu vrijednost.

„Marko Zeljko je dao iz svoje perspektive ljudsku priču. Imao je, očito, vrlo zahvalnog sago-vornika. On je napravio priču koja je sve članove Komisije oduševila te smo došli do jedinstvenog zaključka kako je to prilog koji treba dobiti nagradu“, pojasnio je Misirlić.

Direktor Saveza općina i gradova Federacije Bosne i Hercegovine Vesna Travljanin, napomenula je kako je ova nagrada ustanovljena kako bi se povećala vidljivost aktivnosti Saveza u medijima.

„Odlučili smo se da dodijelimo ovu nagradu i čestitam našem dobitniku Marku Zeljki. Želim da istaknem kako je bio jako veliki broj prijava na Konkurs. Sviđa mi se što je ovaj televizijski prilog pozitivan i originalan. Unesena je jedna ljudska toplina vezana za povratnike u naše krajeve. Nadam se da će ovo podstaći mlade i ne tako mlade novinare da istražuju te da pišu o aktivnostima Saveza općina i gradova Federacije Bosne i Hercegovine“, kazala je za kraj Travljanin.

U SARAJEVU ODRŽANA RADIONICA "SLUŽBENIK ZA ODNOS S JAVNOŠĆU U JEDINICAMA LOKALNE SAMOUPRAVE – SPONA IZMEĐU GRAĐANA I TIJELA LOKALNE UPRAVE"



U Sarajevu, 26. juna/lipnja 2023. godine, u Hotelu Ibis Styles održana je radionica "Službenik za odnose s javnošću u jedinicama lokalne samouprave – spona između građana i tijela lokalne uprave". Radionicu je vodio doc. dr. Drago Martinović, konsultant Savez općina i gradova Federacije Bosne i Hercegovine, koji je na interaktivan način obradio teme i dao praktične primjere iz ove oblasti.

Cilj radionice je bio da se učesnicima/ama prenesu nova znanja i vještine iz oblasti odnosa sa javnošću u jedinicama lokalne samouprave i time poboljša interna i eksterna komunikacija opština i gradova. Učesnici su imali priliku da dobiju dodatna znanja i vještine iz oblasti organiziranosti i razvoja odnosa s javnošću u jedinicama lokalne samouprave u BiH. Osim toga, dobili su nova znanja iz opisa poslova i potrebnih vještina službenika za odnose s javnošću.

KONFERENCIJA „UTICAJ PROCESA EU INTEGRACIJA NA LOKALNE SAMOUPRAVE - MOGUĆNOSTI I IZAZOVI“

Hotel Kardijal u Tesliću 8. juna 2023. godine, bio je mjesto održavanja konferencije na temu „Uticaj procesa EU integracija na jedinice lokalne samouprave - mogućnosti i izazovi“ koji zajednički organizuju Savez opština i gradova Republike Srpske i Savez općina i gradova Federacije Bosne i Hercegovine.

Cilj konferencije je bio prezentovati značaj i uticaj EU integracija na lokalne zajednice, te ukazati na prilike i izazove sa kojima se jedinice lokalne samouprave u Bosni i Hercegovini susreću u svojim nastojanjima da se što bolje pripreme za ove procese. Značaj ove teme je posebno naglašen dodjeljivanjem kandidatskog statusa Bosni i Hercegovini 15. decembra 2022. godine.

Na samom početku prisutne su pozdravili generalni sekretar Saveza opština i gradova Republike Srpske gospodin Aco Pantić, u ime direktora Saveza općina i gradova Federacije Bosne i Hercegovine gospođe Vesne Travljanin, obratio se gospodin Hazim Okanović, kao i program menadžer Ambasade Kraljevine Švedske gospodin Mario Vignjević.

U okviru konferencije su održana tri panela. Gospodin Stefano Ellero, šef kooperacije u Delegaciji EU u BiH, prisutnima je govorio o temi mogućnostima i izazovima u procesu EU integracija za lokalne samouprave, te je istakao kako je prilagođavanje zakona i politika zakonima i politikama Evropske unije, poticaj za poboljšanje života na lokalnom nivou. Gospodin Kelmend Zajazi, izvršni direktor Mreže asocijacija lokalnih vlasti Jugoistočne Evrope, istakao je kako lokalne vlasti imaju veliku ulogu jer se 70 posto EU regulativa i legislative implementiraju na lokalnom nivou.

Istaknuto je kako su savezi općina/opština i gradova u proteklom periodu pokrenuli niz aktivnosti na jačanju kapaciteta lokalnih zajednica za procesa EU integracija. Pokrenuta je i inicijativa za uspostavljanje Revolving fonda koji bi bio na usluzi opštinama i gradovima za predfinansiranje projekata Evropske unije.

Pojašnjeno je kako savezi općina/opština i gradova planiraju da u narednom periodu intenziviraju saradnju sa višim nivoima vlasti i na taj način bolje pripremiti članice za sam proces EU integracija, kako za prilike tako i za obaveze koji ih očekuju u tom procesu.

Zaključeno je kako je neophodno uspostavljanje Revolving fonda za predfinansiranje lokalnih samouprava prilikom apliciranja na EU fondove, kao i nastavak obuka u saradnji sa resornim ministarstvima. Osim toga, zaključeno je kako će se putem saveza općina/opština i gradova nastojati doći do partnera za projekte odnosno baze partnerstava po temama.

Ukazano je kako su potrebni manje zahtjevni projekti za aplikante (konkretniji) i usklađeniji sa potrebama jedinica lokalne samouprave u Bosni i Hercegovini a neki od primjera su EU 4 munis u Albaniji i Exchange program u Srbiji.

Također je zaključeno kako je neophodno uspostavljanje partnerstava kao i uključanje građana u donošenje odluka u cilju artikulisanja potreba jedinica lokalne samouprave. Istaknuta je važnost uključanja lokalnih zajednica u fazu programiranja EU fondova kako bi bili relevantni i usklađeni sa potrebama građana.

Cilj konferencije je bio prezentovati značaj i uticaj EU integracija na lokalne zajednice, te ukazati na prilike i izazove sa kojima se jedinice lokalne samouprave u Bosni i Hercegovini susreću u svojim nastojanjima da se što bolje pripreme za ove procese.



NAJAVA OBILJEŽAVANJA DANA OPĆINA / GRADOVA ZA
MJESEV JULI / SRPANJ

08. juli/srpanj - Dan Općine Tomislavgrad. Naime, tog datuma 1924. godine položen je kamen temeljac za izgradnju Spomen-bazilike u čast 1000. obljetnice krunidbe prvog hrvatskoga kralja Tomislava. Od 1996. godine ovaj dan se obilježava kao Dan Općine Tomislavgrad.

Osnovana Zajednica opština i gradova SRBiH - Na Osnivačkoj Skupštini u Sarajevu, 13.07.1972. godine formirana je Zajednica opština i gradova SRBiH sa ciljem unapređenja i razvoja sistema lokalne samouprave, međuopćinske i međunarodne saradnje.

20. juli/srpanj - Dan Općine Stolac koji je određen povodom blagdana sv. Ilije, zaštitnika grada Stoca.

20. juli/srpanj - Dan Općine Kiseljak. Ovaj datum ima i historijski značaj s obzirom da se u Povelji Bele IV iz 1244. godine spominje da je ovaj kralj 20.07.1244. godine darivao Crkvu sv. Mihovila u Borini. Budući da je to najstariji dokument u kojem se spominje mjesto koje je u užem središtu Kiseljaka, taj dan se obilježava kao Dan Općine Kiseljak.

26. juli/srpanj - Dan Općine Domaljevac-Šamac. Obilježava se kao Dan općine zato što je 26. 07. 1996. godine na svečanoj sjednici Općinskog Vijeća Bosanski Šamac donijeta Odluka o utemeljenju nove općine pod nazivom Općina Domaljevac-Šamac.

27. juli/srpanj - Dan Općine Drvar se obilježava kao dan početka ustanka naroda protiv fašističkog okupatora 1941. godine.

30. juli/srpanj - Dan Općine Glamoč. Tog datuma 1941. godine prvi put je oslobođena teritorija Glamoča.

NAJAVA OBILJEŽAVANJA DANA OPĆINA / GRADOVA ZA
MJESEV AVGUST / KOLOVOZ

06. avgust/kolovoz - Dan Grada Cazin i sjećanje na dan kada je deblokiran Cazin, ali i područje Unsko-sanskog kantona u proteklom ratu.

15. avgust/kolovoz - Dan Grada Široki Brijeg. Naime, ovaj datum se obilježava kao blagdan Velike Gospe.

15. avgust/kolovoz - Dan Općine Posušje. Ovaj datum je značajan za Posušje jer se na taj dan obilježava Velika Gospa.

15. avgust/kolovoz - Dan Općine Kreševo.

16. avgust/kolovoz - Dan Općine Busovača. Pod svojim sadašnjim imenom Busovača se u pisanim dokumentima prvi put spominje 16.08.1371. godine kada je izvjesni Gojko Čepić iz Busovače prodao Johanu Rombaldu Bonu 30 miliarija gvožđa. Navedeni datum je upisan na grbu Busovače.

16. avgust/kolovoz- Dan Općine Vareš - potpaljivanje prve visoke peći u Varešu.

19. avgust/ kolovoz- Dan Općine Bosansko Grahovo- preobraženje Gospodnje.

20. avgust/kolovoz - Dan Općine Olovo. Na ovaj datum je ukopan prvi ŠEHID u „Šehidskom mezarju“ u Solunu (naselje u blizini Olova).

29. avgust/kolovoz - Dan Grada Visoko. Ovaj datum se veže za izdavanje Povelje Kulina Bana 29.08.1189. godine.

31. avgust/kolovoz - Dan Općine Neum. Ovaj datum se veže za Gospu od zdravlja.

Gledajte Savez općina i gradova
Federacije Bosne i Hercegovine na



facebook
Savez općina i gradova Federacije
Bosne i Hercegovine

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način pružamo informacije o održanim sjednicama organa i tijela Saveza, konferencijama, seminarima, radionicama, okruglim stolovima, javnim raspravama, projektnim aktivnostima i sl.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba; ili putem popunjavanja forme na našoj web stranici.

Molimo vas da informacije o našem biltenu prosljedite svima u vašoj i susjednim JLS i drugim zainteresiranim.

Ukoliko želite da objavite neke od vaših novosti, iskoristite bilten Saveza koji je brz i efikasan način komuniciranja.

Sa zadovoljstvom očekujemo vaše komentare, sugestije ili primjedbe.